

رغم التعب

رغم التعب والتناقض منزلك عالي
لو كنت في خطوتك تكثر تعاريجك
عنيـد لكن عنادك حيل يحلالي
ولو كان للعند تاج اعلنت تتويجك
لكن ترفق وشوف وجيه عذالي
تفرح،، تأيد صدودك لي وتحجيجك
يكفي تشوف بعيونك ثوبي البالي
اللي تمزق تحت قسوة كرابيجك
حزين رددت للاحزان موالـي
وانت اتغني فرح واسمع اهـازيجك
لازلت احبك ولكن وعد يالغالي
لابد،، اوقف دعاياتك وتهريجك
وان كنت مهر ولا روضك خيالي
جيت وعلى جثتي عسفك وتسريـجك

متعب التركي

بسافر !!

يقول المحبه ويش لو غابوا الاحباب؟
اقول الجسد من غير نبض وشعور وروح
يقول النهار يغيب! وش موقفك لا غاب؟
اقول ان رضيت اسكت يصير السكوت البوح
يقول السترسمعه وذكر وفعل وثياب!
اقول المحب من الوله والسهر مفضوح
يقول انت قايل لي بسافر بدون عتاب؟!
اقول ايه! قبل اضيع في وجهك المملوح!
قبل تبدي الاعجاب وابادلك الاعجاب
قبل تاخذ احساسى وقلبي عبث وتروح
قبل ينفتح لك بين عوج الحنايا باب
ويبقى على طاريك طول العمر مفتوح
قبل لاتوهق فيك يالصادق الكذاب
قبل لاتحطم منك يالمخطي المسموح
قبل لاتعلقني وترحل بدون اسباب
قبل لاتعلمني اعد السنين جروح!
قبل يتبعك وانت تمادى جفا وغياب
قصيدي ودمع عيوني وصوتي المبجوح!
ياليت الزمن يرجع واحسب لجفاك حساب
وعد ماتعلق فيك وانساك قبل تروح

محمد جارالله السهلي